

-INAUTERIAK EUSKAL HERRIAN-

Doinua: Nire sentimendua aldaera (zortziko txikia)

Inauteri garaia
gurera heltzean
lore bat jaiotzen da
gure bihotzean
KU KU KU KU
nor egongo ote da
maskara atzean?
diru eskean gatoz
ba alda inor etxean?

Zuberoan **Zamaltzain**
eta **Pitxu** beltzez
edalontzi gainean
dantzatzen du errez
KU KU KU
Lapurdin **Kaskarotak**
makilekin kolpez
Kotilungorriekin
kontuz ibil zaitez

Erraldoitxoak dantzan
Behe Nafarroan
Bolant dantzak kaletan
jarririk lerroan
KU KU KU
Lesakan **Zaku zaharrak**
lastoa zorroan
sagurik sartu al da
zure mozorroan ?

Nafarroatik zenbat
mozorro ezberdin
Momotxorro, Sorginak
Ziripot Mielotxin
KU KU KU
Arizkungo **Hartzak** du
erpe ta letagin
Joaldunen pausoan
joareek klin-klin 

Kanpezun **Toribio**
zubitik jaurti ta
Zalduondon **Markitos**
astoan jarrita
KU KU KU
arratsaldean dauka
epaiketan zita
su emango diote
ondo merezita

Eibarren **Koko-dantza**
Donostin **Kauterak**
zenba ezinak dira
Tolosan janzkerak
KU KU KU
hegan ileordeak
ta hegan txisterak
soilik tristetzen gaitu
jaien amaierak

Mundakako **Lamiak**
irrintzika aske
Durangon **Surraundiek**
sudur punta tente
KU KU KU
Trapagaran Ortuella
ta Portugalete
Oilar beltza kaiola
barruan daukate

Loreak koloreak
mozorro ugari
hartza esnatu da ta
txoriak kantari
KU KU KU
zer deritzozu gure
proposamenari?
dantzatzen badiogu
udaberriari.

